

AMARAN BAGI ORANG YANG MENGABAIKAN SOLAT

20 OKTOBER 2023 | 05 RABIULAKHIR 1445H

أَحْمَدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ
سَيِّئَاتِ أَعْمَالِنَا. مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَا هَادِيَ لَهُ.
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ
وَرَسُولُهُ.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.
أَمَّا بَعْدُ،

فِيَا عِبَادَ اللَّهِ، اتَّقُوا اللَّهَ وَأَوْصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Marilah kita bersama-sama meningkatkan ketakwaan kepada Allah Subhanahu wa-Ta'ala dengan melaksanakan segala perintah dan meninggalkan segala larangan-Nya. Mudah-mudahan kita diberkati Allah Subhanahu wa-Ta'ala di dunia dan akhirat.

Sidang Jumaat yang dirahmati Allah Subhanahu wa-Ta'ala

Perintah mendirikan solat disebut berulang-ulang kali dalam al-Quran. Firman Allah Subhanahu wa-Taala dalam surah Taha ayat 14:

أَعُوذُ بِاللَّهِ مِنَ الشَّيْطَانِ الرَّجِيمِ
إِنِّي أَنَا اللَّهُ لَا إِلَهَ إِلَّا أَنَا فَاعْبُدْنِي وَأَقِمِ الصَّلَاةَ لِذِكْرِي

Yang bermaksud: *“Sesungguhnya Akulah Allah, tiada Tuhan melainkan Aku, oleh itu, sembahlah Aku, dan dirikanlah solat untuk mengingati-Ku.”*

Agama Islam itu sendiri terbina berasaskan lima perkara utama. Antaranya ialah perintah mendirikan solat. Sabda Rasulullah Sallallahu Alaihi Wasallam melalui hadis yang diriwayatkan oleh al-Imam al-Tirmizi:

رَأْسُ الْأَمْرِ الْإِسْلَامُ وَعَمُودُهُ الصَّلَاةُ وَذِرْوَةٌ سَنَامِهِ الْجِهَادُ فِي سَبِيلِ اللَّهِ

Yang bermaksud: *“Asas urusan (agama) itu adalah Islam, tiangnya adalah solat dan puncak ketinggiannya adalah jihad di jalan Allah.”*

Sidang Jumaat yang dirahmati Allah Subhanahu wa-Ta'ala

Terdapat masih ramai orang Islam yang meremehkan dan mengabaikan solat fardu. Ada dalam kalangan mereka yang hanya melaksanakan solat sekali sehari, ada pula yang hanya melaksanakan solat sekali dalam seminggu iaitu solat Jumaat. Yang lebih parah lagi, tidak sedikit yang hanya ingat dan melaksanakan solat dalam setahun dua kali, iaitu ketika solat AidilFitri dan AidilAdha sahaja. Ada juga dalam kalangan mereka yang berani meninggalkannya dengan sengaja dan terang-terangan. Kadangkala hanyalah disebabkan oleh perkara yang kecil seperti kerana bersukan, sibuk bekerja, membeli belah di pusat-pusat jualan atau dengan alasan terlalu letih.

Lihatlah pada waktu maghrib, waktu itulah ramai berpusing-pusu di pasar malam dan di waktu itulah juga ramai menjamu makanan di restoran dan gerai makanan. Ada juga yang masih leka bersukan di padang permainan walaupun azan maghrib berkumandang.

Sidang Jumaat yang dirahmati Allah Subhanahu wa-Ta'ala

Pelbagai ancaman berat dijanjikan kepada orang yang meninggalkan solat. Antaranya ialah boleh dihukumkan kafir sekiranya dia menafikan kewajipan solat. Sabda Rasulullah Sallallahu Alaihi Wasallam melalui hadis yang diriwayatkan oleh al-Imam al-Tirmizi.

العَهْدُ الَّذِي بَيْنَنَا وَبَيْنَهُمُ الصَّلَاةُ فَمَنْ تَرَكَهَا فَقَدْ كَفَرَ

Yang bermaksud: *“Perjanjian yang ada antara kami dengan mereka (orang kafir) adalah solat. Maka barangsiapa yang meninggalkannya maka dia telah kafir.”*

Dosa meninggalkan solat juga akan menyebabkan seseorang itu dimasukkan ke dalam neraka. Firman Allah Subhanahu wa-Taala dalam surah al-Muddaththir ayat 42-43.

مَا سَلَكَكُمْ فِي سَقَرٍ ﴿٤٢﴾ قَالُوا لَمْ نَكُ مِنَ الْمُصَلِّينَ ﴿٤٣﴾

Yang bermaksud: *(Setelah melihat orang yang berdosa itu, mereka berkata): "Apakah yang menyebabkan kamu masuk ke dalam (Neraka) Saqar?" Orang yang berdosa itu menyebabkan Mereka menjawab, "Kami dahulunya tidak termasuk dalam kumpulan orang yang mengerjakan solat.”*

Sidang Jumaat yang dirahmati Allah Subhanahu wa-Ta'ala

Orang yang meninggalkan solat juga turut diancam bahawa mereka akan disiksa dengan dikumpulkan bersama Qarun, Firaun, Haman dan Ubay bin Khalaf. Rasulullah Sallallahu Alaihi Wasallam bersabda melalui hadis yang diriwayatkan oleh al-Imam Ahmad.

Yang bermaksud: *“Barangsiapa yang menjaganya (solat fardhu) maka dia akan memperoleh cahaya dan bukti keimanan yang nyata serta keselamatan pada hari kiamat. Dan barangsiapa yang tidak menjaganya, maka tiada baginya cahaya dan bukti keimanan yang nyata serta keselamatan. Dan adalah dia pada hari kiamat (dikumpulkan) bersama Qarun, Firaun, Haman dan Ubay bin Khalaf.*

Orang yang meninggalkan solat jiwanya selalu gelisah dan tidak tenang. Manakala orang yang melaksanakan solat jiwanya akan sentiasa tenteram dan damai. Firman Allah Subhanahu wa-Taala dalam surah Al-Ma'arij ayat 19 hingga 23:

إِنَّ الْإِنْسَانَ خُلِقَ هَلُوعًا ﴿١٩﴾ إِذَا مَسَّهُ الشَّرُّ جَزُوعًا ﴿٢٠﴾ وَإِذَا مَسَّهُ الْخَيْرُ مَنُوعًا ﴿٢١﴾
إِلَّا الْمُصَلِّينَ ﴿٢٢﴾ الَّذِينَ هُمْ عَلَى صَلَاتِهِمْ دَائِمُونَ ﴿٢٣﴾

Yang bermaksud: "*Sesungguhnya manusia itu dijadikan bertabiat resah gelisah (lagi bakhil kedekut). Apabila dia ditimpa kesusahan, dia sangat resah gelisah. Dan apabila dia beroleh kesenangan, dia sangat bakhil. Kecuali orang yang mengerjakan solat. Iaitu mereka yang berterusan mengerjakan solat mereka.*"

Syeikh Daud Al-Fathoni dalam kitabnya "*Munyatul Musolli*" menjelaskan bahawa meninggalkan solat lima waktu adalah dosa besar. Pihak pemerintah adalah bertanggungjawab dan berdosa jika tidak menghiraukan urusan agama lebih-lebih lagi solat lima waktu dan solat Jumaat sebagaimana yang diperintahkan oleh syarak.

Sidang Jumaat yang dirahmati Allah Subhanahu wa-Ta'ala

Melaksanakan solat secara istiqamah akan memberi ketenangan serta kedamaian kepada hati orang yang sentiasa melaksanakannya kerana dalam solat terkandung zikrullah. Firman Allah Subhanahu wa-Taala dalam surah Ar-Ra'd Ayat 28.

Yang bermaksud: "*(Iaitu) orang yang beriman dan tenang tenteram hati mereka dengan zikrullah". Ketahuilah dengan zikrullah itu akan mententeramkan hati.*"

Oleh itu, menjadi tanggungjawab kita semua, sama ada diperingkat keluarga, masyarakat dan pemerintah untuk mempertingkatkan lagi usaha dan galakan agar setiap ahli keluarga kita, masyarakat dan umat Islam seluruhnya sentiasa mendirikan solat dengan istiqamah dan tidak mengabaikannya. Firman Allah Subhanahu wa-Taala dalam surah Taha ayat 132:

أَعُوذُ بِاللَّهِ مِنَ الشَّيْطَانِ الرَّجِيمِ

وَأْمُرْ أَهْلَكَ بِالصَّلَاةِ وَاصْطَبِرْ عَلَيْهَا

Yang bermaksud: *“Dan perintahkanlah keluargamu serta umatmu mengerjakan solat dan hendaklah engkau bersabar menunaikannya.”*

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ، إِنَّهُ هُوَ
السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ،
وَلِسَائِرِ الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ،
فَأَسْتَغْفِرُوهُ إِنَّهُ هُوَ الْغَفُورُ الرَّحِيمُ.